

Surat khabar: Utusan Borneo (Tempatan)

Hari/Tarikh: 27/8/2013

Muka surat: 3

Tajuk : BGA Sasar Daftar 1,000 Ahli Baharu.

BGA sasaran daftar 1,000 ahli baharu

KUCHING: Persatuan Graduan Bidayuh (BGA) menetapkan sasaran untuk mendaftarkan 1,000 ahli baharu pemegang diploma dan ke atas daripada institusi pengajian tinggi yang diiktiraf kerajaan menjelang penghujung tahun ini.

Penasihatnya Dato Sri Michael Manyin Jawong berkata, sasaran itu dilihat mampu dicapai sekiranya pendekatan lebih menyeluruh dapat digunakan BGA untuk mendaftarkan ahli baharu.

Menurutnya, pada masa ini terdapat lebih 20,000 graduan Bidayuh di seluruh negara yang bertugas sebagai profesional, ahli perniagaan, kakitangan kerajaan dan pekerja swasta.

"Kita boleh lihat sekarang hampir setiap perkampungan Bidayuh mempunyai graduan."

"Adalah tidak menjadim salah untuk BGA mendaftarkan ahli baharu untuk membolehkan persatuan itu lebih kukuh," katanya kepada pemberita selepas menerima kunjungan hormat daripada BGA semalam.

Rombongan BGA diketuai Presidennya Dr Ahi Sarok yang juga pensyarah Universiti Malaysia Sarawak (UNIMAS).

Manyin berkata BGA perlu bertindak lebih agresif dalam pendaftaran ahli baharu kerana bertanggungjawab dalam merencana pendidikan masyarakat Bidayuh.

"Kita perlu berusaha lebih keras termasuk mengambil berat dalam aspek pendidikan masyarakat Bidayuh.

"Sebagai orang yang berpendidikan, kita harus kembali untuk membantu masyarakat terutama dalam kalangan mereka yang memerlukan terutama yang menghadapi masalah untuk melanjutkan pelajaran," ujarnya.

Dalam pada itu, Ahi menjelaskan bahawa BGA merancang untuk mengadakan program khas pendaftaran ahli dalam usaha menarik lebih ramai graduan muda.

"Kami akan mengadakan program khas pendaftaran ahli baharu terutama dalam kalangan graduan muda dan baharu," jelasnya.